

Dinge probiren soll / ehe er dieselben vnterstehe außzuziehen / auff daß er nicht vergebliche Arbeit thue vnd Schaden leide / sondern mit gutem Vorthail seyn Werck anstellen vnd treiben möge.

Vnd ist zu verwundern / daß der Mensch so thöricht ist / nach einem Vngewissen sucht / das Gewisse aber vor Augen liegen hat / vnd nicht achtet. Dann der mehrertheil solcher Menschen / welche in den Metallen eine Verbesserung suchen / reich darmit zu werden / arbeiten auff ein vngewisses / weil vnter Tausenden kaum einer dasjenige findet / das er sucht. Vnd ob wol die vnvollkommene unreine Metallen können gezeitiget vnd gereiniget werden / daß beständig vnd gut Gold vnd Silber darvon kompt / so ist doch solche Wissenschaft wenigen gegeben / vnd ist auch nicht ein jedweder bequäm vnd verständig solche Arbeit zuverrichten / sondern will durch wolgeübte / der Metallen erfahrene Künstler (welche sehr dünn gesäet) gethan seyn. Das Gewisse aber kan mit geringer Mühe vnd Kosten durch einen gemeinen Laboranten / der nur ein wenig mit schmelzen vnd abtreiben vmbzugehen weiß / gefunden werden / wann man nur den Dingen etwas nachdencket / vnd nicht gar zu hoch hinauß vnd auff einmal reich werden will.

Dieses aber wil ich darbey erinnern haben / daß man ja zusehe / daß man solche Steine extrahire,